

Biografía di Marta María Figueroa-Lacle

Marta María Figueroa – Lacle a nace na Oranjestad, Aruba, dia 2 di october 1949. Su tata yama Jozef Jacob, pero nan ta yam'e Jacobo. Su mama yama Rosalinda y nan ta tabata yam'e Rosa. Marta a nace y crece den e bario banda di misa di Playa. Nan tabata shete ruman. Tin algun cu a fayece caba. Marta ta e di seis, e ta e prome yiu muhe y tabatin cinco ruman homber y despues a bin dos yiu muhe mas. Na año 1969 Marta a casa cu Oscar Figueroa. Fecha di nacemento di Oscar ta 26 di juli 1938. Nan tin tres yiu. E prome ta Indrah, kende a nace na mei 1969, despues a bin Sasha na maart 1970 y Oscar Angelo (nan ta yam'e Angelo), kende a nace na september 1973. Tur e rumannan di Marta a bay les di fio y piano y un tabata toca saxofon tambe. E tabatin un mas cu tabata toca guitarra. Marta su mama tambe tabata hopi musical.



Segun Marta e bida artistico a nifica locual e tabata gusta fo'i tempo cu e tabata chikito.

Marta a casa cu un persona cu ta gusta musica y su yiunan tambe ta gusta musica. El a keda den musica y ta loke el a gusta fo'i tempo e tabata chikito. E ta corda ora cu Oscar a fayece, Pierewietje a "back e up". Semper Oscar tabata yuda Marta, e ta traha cancionnan tambe y asina ta tene contento.

E bida artistico

Marta semper a gusta musica y e muchanan. El a cuminsa cu les di piano cu cuatro año, cerca juffrouw Sofia Eman. Esey ta tempo e tabata mas chikito. El a duna Marta les hopi año. Despues Marta a haya les di meneer Seiler kende tabata director di Arubaanse Muziekschool. Na Corsou, Marta a bay internaat y el a haya les di Coco Palm tambe pa un tempo, pasobra Marta no a keda mucho na internaat. Tempo e tabatin dies año, e tabatin un juffrouw cu ta bira constantemente malo, anto pa Marta esaki a resulta bon: nan ta haya liber, nan tin di bay cas. Pero, di biaha e tabata bay kleuterschool cu tabata band'i su cas e tempo ey. E tabata yuda

e juffrouwnan cu e muchanan y tabata canta cu nan. Ademas den e mesun temporada ey, Marta tabatin su primanan cu tabata biba un tiki mas leu, na Dominicanessestraat. Nan tabata reuni, semper nan ta bay hunga cerca otro y nan a dicidi di lanta un club. E tempo ey, e "bokkesprong" tabata hopi na moda. Number di e club a bira "De bokkespringers". Nan tabata hopi hulandes orienta e tempo ey na scol y nan a cuminsa organisa algun cos. Pa nan por a haci un feria, nan a cuminsa cumpra e cosnan cu e muchanan por gana. Cu placa cu nan a spaar, nan tabata cumpra cosnan pa grabbelton etc. Marta tabatin un ruman homber tambe cu tabata un bon tecnico.



E tabata pone cahanan di palo, ta fura nan - e tempo ey tabatin propaganda di sigaria di carton manera poster - anto esey e tabata pega pa dorna e cahanan un tiki pa nan no keda mahos. Pero ta mucha chikito so mag di sinte eyden. . E ta pone e motor drey, anto supuestamente nan tin manera un estilo di cabayito cu e autonan cu ta drey. Nan tin grabbelton y touwtjes trekken. Tambe nan tabata haci show. Francis cu nan tabata yam'e Pati, tabata e ruman mas chikito,

Marta tabata yuda e juffrouwnan cu e muchanan y tabata canta cu nan na kleuterschool ora e haya liber

Marta ta cana bay den becindario di Sividivi, anto e ta bisa cas pa cas cu nan tin show y ta cuatro placa (dies cen) pa entrada!

pero di tamaño e ta mas grandi cu Marta. E tabatin hopi interes den electronica. E tambe tabata yuda nan. Nan tabata haci show tambe. E tempo aya, no tabatin facebook, Tele Aruba no a cuminsa ainda cu nan por a haci propaganda. Tabatin radio-emisora, pero nan a dicidi cu nan mes ta haci propaganda. Marta ta cana bay den becindario di Sividivi, anto e ta bisa cas pa cas cu nan tin show y ta cuatro placa (dies cen) pa entrada! E hendenan ta bin, kiermen nan ta haya e publico cu nan a spera. Nan mester a pone un cantidad di stoel, pa tur cu ta presencia e show. Marta tabatin un tape recorder cu el a haya cerca un otro ruman homber. E tabata graba tur e canticanan, E ta toca nan, anto fuera di esey nan tabatin “disconan 78” tambe. Cu e disconan, nan ta combina pa haci e bailenan. Marta ta haci un tiki baile y su prima Gladys cu a fayece

recientemente, tabata bin cu coreografia. E ta coy saya di su mama pa e bailenan, door cu ya nan no tabata tin mucho cen pa cumpra paña. Tambe di nan spaargeld nan ta bay cumpra crêpe-papier, anto cada baile nan ta duna un color. Marta tabata wak con nan tabata cose, pasobra su mama tabatin negoshi di cosemento tambe. Despues e mes tabata cose y tabatin negoshi. Nan ta wanta tur cos cu un faha hancho y un blusa blanco. Asina e trahenan di e baile a keda cla. Ora Marta a bira mas grandi, el a casa tambe. Marta a cuminsa traha cantica, pasobra mester cantica pa graba. Anto Oscar su casa, a bis’e cu e tin yen di amigo cu ta gusta toca. Nan a train e canticanan y a keda mas o menos cla pa graba. Marta su ruman homber Antonio a tende cu nan ta den cuenta di graba. Masha entusiasmo ya e tabata para cla pa yuda cu e grabacion. E tempo ey e no tabatin un bon studio di grabacion ainda.

Dedicacion musical

Piano ta e unico instrumento musical cu Marta por a toca. E kier a siña toca guitarra, pasobra ta facil pa bo bay tur caminda cu bo guitarra. Sinembargo, su mama a “pone pia bou” cu e mester bay les di piano! Su mama tabata hopi streng! Tabatin un señora cu tabata wak pa nan, ta gewoon tal dia y tal ora bo tin cu bay y e ta pone

cu mester bay practica nan les cu nan tin pa e siguiente biaha. Tin biaha Marta kier a “horta un short”: e ta lanta for di piano, cana bay, luga mama ta scondi tras di e porta! E ta wak Marta y ta bis’e pa e bay bek! Obligatoriamente Marta ta bolbe sigui cu su ehercicionan di piano, cu na final toch sigur a yud’e cu su proyectonan musical.



Show di Pierewietje

Desaroyo musical

E muchanan a graba y Oscar a bin puntr’e ta con a para cu e disco di largo duracion (longplay). Ta e muchanan ta puntra, nan kier tende con e cos a sali. Y asina Marta a bay traha riba esey. Nunca di su bida el a graba un disco. Antonio su ruman a bisa Marta cu Eduardo Maya cu ta toca trompet, ta bayendo Colombia cu su banda. El a bisa cu si nan dun’e e cen, e por hiba e “master tape” na e compania cu ta imprimi disco, anto cada ken ta bin cu un caha di longplay bek pa Aruba. Nan a manda traha mil longplay. Marta a bay cerca Imelda de Cuba kende tabata “e producer”.



Produccion di Pinturanan

Marta tabata presenta di aña 1976 e programa Matinette na television. Esaki a dura shete aña. Marta sa cu Imelda tabata ilustra masha bon mes. A bin tur e parti electronico cu luz etc. como cu nan

tabatin programa cu pregunta tambe, puzzels etc. y ta Imelda cu su pintamento, a produci e programa. Marta tabata djis present'e, e ora cerca dje el a bay ilustra e caratula di e disco y el a bis'e mas o menos kico e kier di cada cantica. El a keda manera manera un collage. Esey a bay Colombia y despues di un luna mas o menos, ata e longplay a bin. Esaki tabata algo grandi! No tabatin longplay di mucha e tempo ey y e tabatin un cantica cu yama Pierewietje riba dje. Marta a yama e



Diferente Longplay di Pierewietje

longplay Pierewietje, door cu e nomber tabata zona bon. Pierewietje paharito. E hendenan ta bisa Marta mi por haya un longplay di Pierewietje? Anto asina e nomber a bin y el a keda bon pega tambe: Pierewietje!

Preparacion pa actividadnan musical

Marta a cuminsa prome cu su yiunan. Despues nan a sigui cu un grupo di seis mucha. Di biaha e cantidad a bira diesun cu mas mucha tambe den famia, subrino y primo. Ora Marta su yiunan a cumpli diesdos, diestres aña, nan di cu Pierewietje ta zona bon pa mucha chikito y nan a sali for di e grupo. Ok, e ora door cu Marta a bende asina hopi longplay, hopi hende tabata conoce. E tabata traha cu un señora Carmen na oficina di notario, anto el a conseha Marta pa e sigui cu otro muchanan tambe cu no ta e famia. Bo no mester hacie di bo famia so. Laga nan purba e ora.

Marta a cuminsa tuma algun mucha, pero e tabata concentra mas tanto riba canto y tabata haci audicion pa canto riba un diadomingo asina na cas di Carmen. Pasobra Carmen a bisa cu nan por bay train na su cas. Dilanti di e cas tabata yen di auto, muchanan tabata bin masha bunita bisti, anto nan tin di haci audicion, pa despues Marta scohe ken por forma parti di e grupo. Y despues bo ta haya e muchanan cu kier balia tambe. Marta a concentra menos riba baile. Pero ya, nan a busca un coreografo despues, of hende cu sa mas di baile pa train nan. Anto e ora el a bira un grupo



Muchanan chikito di Pierewietje



Grupo mas grandi Flash



Show di Pierewietje & Flash

Marta tabatin grupo, despues el a bira dos grupo, despues el a bira tres grupo. El a cuminsa cu muchanan chikito y esnan mas grandi. Ata, e grandinan no kier bay, nan kier keda! E ora ya el a bira boshi, boshi mucha. Carmen a bisa Marta, bo sa awor si, no mas na su cas. Marta tabatin comprension pa esaki y pa suerte el a logra haya juffrouw Anchie di scol preparatorio na Washington, kende a ofrece pa practica na e scol ey y te ainda nan t'ey! Awor cu juffrouw Rini y mas cu 150 mucha.

Grabacionnan realisa

Tin hopi grabacion realisa. Marta no a conta nan, e tin hopi longplay, hopi CD, hopi cassette. E tin algun video tambe y Tele Aruba a graba hopi, pero Marta no a wak tur ultimamente cu nan tabata tin “ban bek den tempo”. Pero na 2013 e ora Marta a laga filma tur e shownan. Pasobra e ta haya pica cu tin un show cu e kier wak, anto e no tin e filmacion di dje. For di 2013 te 2019, Marta tin tur e shownan filma. Esaki ta un recuerdo di gran balor.



CDnan di Pierewietje & Flash



Grabacion di shownan di Pierewietje & Flash

E parti internacional



Pierewietje & Flash

E grupo a presenta na Corsou, Boneiro y Hulanda. E muchanan grandi a bay Sint Maarten y Santo Domingo. Nan a yega di participa hasta pa un baile, anto nan a gana den baile. Esaki ta existi hopi preparacion, disciplina y responsabilidad, pero nan a bay p'e! E muchanan a presenta na varios ciudad na Hulanda.

Acontecimiento cu Marta ta considera mas importante den e bida artistico

Pa Marta su bida a bira Pierewietje, pasobra el a cuminsa cu Pierewietje y e no a stop mas. Marta kier a lag'e un biaha, dos biaha, tres biaha. Pero e no por a lag'e.

Sugerencia na futuro generacion

Marta ta kere caminda cu e muchanan por siña algo di musica, o sea den baile, of riba un instrument, duna nan e oportunidad aki of pusha nan pa hacie tambe. Pasobra hopi biaha ta e mayornan - compara cu antes - no ta colabora mas. Nan colaboracion ta menos. Pero sigur, poco poco e mayornan moderno lo realisa cu nan yiunan merece un educacion cultural cu lo yuda nan grandemente den nan desaroyo general pa nan ta exitoso den bida.

